

摘藻堂四庫全書薈要

經部

欽定四庫全書薈要

經部

欽定春秋傳說彙纂卷三十五



欽定四庫全書薈要卷一千八百二十六

經部

欽定春秋傳說彙纂卷三十五

已敬王十八年晉定十年齊景四十六年衛靈三十三年蔡昭十七年鄭獻十二年曹靖四年

陳懷四年杞僖四年宋景十五年秦哀十五年楚昭十四年吳闔廬十三年

春秋左傳卷三十五
春王正月公侵齊

左傳

八年春王正月公侵齊門於陽州士皆坐列曰

顏高之弓六鈞皆取而傳觀之陽州人出顏高

奪人弱弓籍丘子鉏擊之與一人俱斃偃且射子鉏

中頰殪顏息射人中眉退曰我無勇吾志其目也師

退冉猛偽傷足而先其

兄會乃呼曰猛也殿

集說

杜氏預曰報國夏之伐也
傳言魯無軍政士無關志

公至自侵齊

集說

張氏洽曰魯陽虎用事用兵無法故以侵
書之軍政不立而公親行故書致以危之

附錄左傳

二月己丑單子伐穀城劉子伐孟以定王室
趙鞅

言於晉侯曰諸侯唯宋事晉好逆其使猶懼不至今
又執之是絕諸侯也將歸樂祁士鞅曰三年止之無
故而歸之宋必叛晉獻子私謂子梁曰寡君懼不得
事宋君是以止子子姑使溷代子子梁以告陳寅陳
寅曰宋將叛晉是棄溷也不如待之樂祁歸卒於大
行士鞅曰宋必叛不如止其尸以求成焉乃止諸州
穀城杜注在河南縣西後漢志河南郡穀城湟水
出今河南府洛陽縣西北有穀城故城水經注城

西臨穀水故名簡城周邑周有簡師父簡城蓋其采地也孟周邑今河南懷慶府河內縣西北有邾臺鎮古孟國也水經注京相璠曰野王西北三十里有故邾城邾臺是也州杜注晉地

二月公侵齊

左傳

公侵齊攻廩丘之郭主人焚衝或濡馬褐以救之遂毀之主人出師奔陽虎偽不見冉猛者曰猛在此必敗猛逐之顧而無繼偽顛虎曰盡客氣也苦越生子將待事而名之陽州之役獲焉名之曰陽

州

集說

杜氏預曰未得志故孫氏復曰公再侵齊以重其怨甚矣

三月公至自侵齊

集說

劉氏敞曰穀梁曰公如往時致月危致也往月致時危往也往月致月惡之也非也公如往時

致月此則文公十三年冬公如晉十四年正月公至自晉是也是時公未至晉而衛侯會公於沓至晉而得其君盟盟而反鄭伯又會公于棐一出而三國附最榮矣何以危致也夫往月致時此則宣十七年六月同盟于斷道秋公至自會是也是時諸侯協心而同外楚列國為一無有他變何以危往也夫往月致月此則僖四年正月侵蔡蔡潰遂伐楚八月公至自伐楚是也是時齊桓主諸侯穀梁以齊桓為知所侵又曰以伐楚致大伐楚何以惡之也且穀梁欲言其危當得其危之狀欲言其惡當指其惡之形今謂之危無狀也謂之惡無形也非所以解經也高氏閌曰公逾月之間再出侵齊乍往乍來不得休息公之進退蓋不自專矣故兩書侵至以見之任氏公輔曰三月之間而兩侵鄰國無尺寸之功而重丘山之

怨輕用其忿而不恤其民甚矣卓氏爾康曰陪臣執國三桓拱手虎已無復顧忌正月無功勸公再往枕干席戈久居敵境公何不自危哉故不待踰月或即在本月皆書至

曹伯露卒

集說

汪氏克寬曰自聲公立五年其弟通弑之代立是為隱公隱公立四年其弟露又弑之代立凡

立四年卒

子陽嗣

夏齊國夏帥師伐我西鄙

左傳

夏齊國夏高張伐我西鄙

集說

許氏翰曰春秋書內伐十六宣以後七內侵七宣以後六伐我二十一宣以後十七侵我五宣

以後一用兵則侵多而伐少被兵則伐多而侵少蓋魯自中世衰矣而欲與齊構怨以侵易伐其能久乎高氏閔曰以公不與鹹沙之盟且報此春之再侵也昭公之孫也齊雖不克納而有意存之矣定公即位未嘗修好於齊故齊比年伐我而我亦再侵齊觀春秋書齊伐公侵則其曲直可見矣

公會晉師于瓦

瓦杜注衛地東郡燕縣東北有瓦亭水經注酸漬水自燕城東逕滑臺城又東

南逕瓦亭南今直隸大名府滑縣東南瓦岡集古瓦亭也

左傳

晉士鞅趙鞅荀寅救我公會晉師于瓦范獻子執羔趙簡子中行文子皆執鴈魯於是始尚羔

胡傳

案左氏晉士鞅荀寅救魯則其書公會晉師何也春秋大法雖師次於君而與大夫敵至用大

衆則君與大夫皆以師為重而不敢輕也故棊林之會不言趙盾而言晉師瓦之會言晉師而不書士鞅

於以見人臣不可取民有衆專主兵權之意陳氏厚施於齊以移其國季孫盡征於魯以奪其民皆王法所禁也春秋之義行則不得為爾矣

集說

杜氏預曰將來救魯公逆會之救不書齊師已去孫氏復曰晉師救我故公會于瓦陳氏

傳良曰不曰會士鞅曰會晉師重師也鞅之戰公會晉師于上鄆不書諱之也四卿竝將而以禽鄭自師逆公三家之張成於此矣故諱之也於是齊師伐我晉士鞅趙鞅荀寅救我公會晉師勿諱可也程氏端學曰義在公會晉師故不書晉卿名以諸侯之尊越國會諸侯之師一見魯之微弱二見當時惟知附勢而不顧理之不可也余氏光曰季氏曰定公因齊伐西鄙親至于瓦以待晉師之救比其至也則齊兵已退故晉救不書夫魯大國也三家合力豈不足以禦齊特以此時政在陪臣制於陽虎故門庭之寇

不能即却而使公遠出境外求晉出師已非謀國之道矣而況晉方好賄伯業已隳師出後期無濟於事又何足恃以為安乎則不若與齊平之為善矣

公至自瓦

集說 高氏閌曰不以會至者公非出會也 李氏廉曰會師之說胡氏於棐林全主公羊而此條又發重師之義與前說微異蓋二義互相發明也要之春秋之旨不以公會大夫特因此又以見師之為重耳

秋七月戊辰陳侯柳卒

晉士鞅帥師侵鄭遂侵衛

士公作趙

左傳

晉師將盟衛侯於鄆澤趙簡子曰羣臣誰敢盟

衛君者涉佗成何曰我能盟之衛人請執牛耳

成何曰衛吾溫原也焉得視諸侯將歆涉佗援衛侯

之手及挽衛侯怒王孫賈趨進曰盟以信禮也有如

衛君其敢不唯禮是事而受此盟也衛侯欲叛晉而

患諸大夫王孫賈使次於郊大夫問故公以晉詬語

之且曰寡人辱社稷其改卜嗣寡人從焉大夫曰是

衛之禍豈君之過也公曰又有患焉謂寡人必以而

子與大夫之子為質大夫曰苟有益也公子則往羣

臣之子敢不皆負羈紲以從將行王孫賈曰苟衛國

有難工商未嘗不為患使皆行而後可公以告大夫

乃皆將行之行有日公朝國人使賈問焉曰若衛叛

晉晉五伐我病何如矣皆曰五伐我猶可以能戰賈

曰然則如叛之病而後質焉何遲之有乃叛晉晉人

請改盟弗許秋晉士鞅會成桓公

侵鄭圍蟲牢報伊闕也遂侵衛

鄆澤
衛地

集說

許氏翰曰招攜以禮懷遠以德鹹沙之盟諸侯已貳晉不思德禮之是務而欲恃力攘服則失

霸何日之有高氏閔曰鄭伯與齊為鹹之盟衛侯

與齊為沙之盟二國皆為齊而叛晉晉是以侵鄭侵

衛所以絕齊之與國也晉不聲其罪不能取服故兩

書侵陳氏傳良曰其言遂晉始伐與國也襄之二

十三年齊始叛晉取朝歌去年鄭衛迭叛晉於是侵

鄭衛又明年及齊平魯亦叛晉矣故悉書之也李

氏廉曰晉自召陵之後苟有事於諸侯皆書侵今年

士鞅侵鄭衛哀七年魏曼多侵衛十年趙鞅侵齊十

三年曼多侵衛豈果潛師掠境歟蓋義不足以服人

故春秋例之以無名之師也汪氏克寬曰齊之始

伐盟主則書伐衛遂伐晉晉之始討與國則書侵鄭

遂侵衛齊書伐而晉書侵於此見晉霸之衰之甚也

然成二年楚師鄭師侵衛不書遂侵我十五年楚子
侵鄭不書遂侵衛雖十六年知武子以諸侯之師侵
陳遂侵蔡亦不書也必若鄭衛叛晉晉以師
兩侵之而後書焉以著諸侯之不復從晉也

葬曹靖公

九月葬陳懷公

集說

杜氏預曰三
月而葬速

季孫斯仲孫何忌帥師侵衛

左傳

九月師侵
衛晉故也

集說

高氏閌曰以其為晉興師故書侵
汪氏克寬曰成六年蔑僑如侵宋傳云晉命也今斯何忌

侵衛傳亦云晉故也二卿竝將以虐婚姻之國陵兄弟之邦非出已意而迫於霸國之威故春秋皆書侵以譏之

冬衛侯鄭伯盟于曲濮

曲濮杜注衛地蓋濮水曲折之處猶言河曲汾曲也在今山東

東昌府濮州境

集說

杜氏預曰結叛晉高氏問曰去年公侵鄭今年二卿侵衛皆為晉故而士鞅又自帥師侵之

故二君同為此盟以固其謀

從祀先公

左傳

季寤公鉏極公山不狃皆不得志於季氏叔孫輒無寵於叔孫氏叔仲志不得志於魯故五人

因陽虎陽虎欲去三桓以季寤更季氏以叔孫輒更叔孫氏已更孟氏冬十月順祀先公而祈焉辛卯禘

於僖公

公羊

從祀者何順祀也文公逆祀去者三人定公順祀叛者五人

穀梁

貴復正也

胡傳

蜀人馮山曰昭公至是始得從祀於大廟其說是也季氏逐君而制其死生之命公薨乾侯不

得終於正寢既薨七月又不得以時歸葬既葬絕其兆域又不得同於先君而在墓道之南至孔子為司

寇然後溝而合諸墓則其主雖久未得從昭穆而祔祭宜矣及意如已卒陽虎專季氏將殺季孫斯而亂

魯國託於正以售其不正始以昭公之主從祀大廟蓋欲著季氏之罪以取媚於國人然其事雖順其情

則逆春秋原情制法故不書禘事與日特曰從祀先公於盜竊寶玉大弓之上見事出陽虎而不可詳也

其亦深切

著明矣

集說

杜氏預曰從順也先公閔公僖公也將正二公之位次所順非一親盡故通言先公孔氏穎

達曰傳言順祀是從為順也文二年大事于大廟躋僖公升僖於閔上閔先為君退在僖下是逆也今升閔在僖上依其先後是順也廟主失次唯此二公故知從祀先公唯閔僖耳躋僖公指僖言之此不指言僖升閔者彼所升者止升僖公之一神不得不指言僖公也今從祀之時閔僖俱得正位且以親盡故通言先公此言從祀躋僖公不言逆祀者此從祀因躋僖公之文故得畧言從祀至於躋僖公文無所繫不知逆祀何公且見是親廟不可言先公故指僖言之而言躋也然則此以親盡故通言先公下桓宮僖宮災

彼亦親盡言桓僖者彼據災之所在須指言其處與此體例不同 王氏浴曰從祀先公大事也不由公命而由陽虎故不書禘又不書日 蘇氏轍曰先公閔僖也逆祀則稱躋僖公順祀則稱先公何也徧祀先公也於是陽虎欲去三桓故順祀而祈焉虎之謀去三桓亂也而其順祀則禮也春秋善惡不以相及各書其實而已 高氏閔曰從順也不曰順者其事則順其意則非故變其辭曰從也夫魯祀之不順多矣武公煬公在所當祧僖公閔公在所當正昭公則又當祀而不祀者也今但稱先公則盡從典禮不止為一公設也然不舉所祀之名不指所祀之所者非時妄祀其事可醜出於陽虎之矯舉故雖禮之復正者而聖人實書之在盜竊寶王大弓之上所以誅陽虎之亂也所謂定哀多微辭者意在言外也嗚呼千載之下姦偽之迹禍亂之變彼假托以濟其私者豈特一陽虎而已哉 薛氏季宣曰從祀者何順祀也

魯之祭也躋僖公外昭公從祀之祀始正其禮也汪氏克寬曰三傳皆以從祔為順祀閔僖二公惟馮氏謂祔祭昭公而文定引其說薛氏高氏兩用之今考之經昭公之葬稱諡疑已祔祭祖廟而從祀不稱昭公與祔于莊公書法不侔則三傳似亦可通或者謂升閔降僖非當時之急務然陽虎雖祔祭昭公而道南之墓猶待孔子為司寇而合乎先君之兆域則又何也劉原父曰陽虎惡季氏以臣而陵君猶僖公以子而先父故先正逆祀以微諭其意其說亦佳姑記以俟來哲

案經書從祀左氏及公穀謂正閔僖之位胡傳獨以為昭公至是始從祀於大廟其說不同汪氏克寬兩存其說而頗致疑於胡傳考前此經文曰吉禘于莊公曰禘于大廟用致夫人曰大事于大廟躋僖公皆直指其入書之今但云從祀先公而不言以何公從祀則胡傳誠若可疑然其說與當日事情相近未可

刪去今姑並存四傳以俟再考至
孫氏復以先公為后稷恐未可從

盜竊寶玉大弓

左傳

壬辰將享季氏於蒲圃而殺之戒都車曰癸巳至成宰公斂處父告孟孫曰季氏戒都車何故

孟孫曰吾弗聞處父曰然則亂也必及於子先備諸與孟孫以壬辰為期陽虎前驅林楚御桓子虞人以鉞盾夾之陽越殿將如蒲圃桓子咋謂林楚曰而先皆季氏之良也爾以是繼之對曰臣聞命後陽虎為政魯國服焉違之徵死死無益於主桓子曰何後之有而能以我適孟氏乎對曰不敢愛死懼不免主桓子曰往也孟氏選圉人之壯者三百人以為公期築室於門外林楚怒馬及衢而騁陽越射之不中築者闔門有自門間射陽越殺之陽虎劫公與武叔以伐孟氏公斂處父帥成人自上東門入與陽氏戰於南

門之內弗勝又戰於棘下陽虎敗陽虎說甲如公宮
取寶玉大弓以出舍於五父之衢寢而為食其徒曰
追其將至虎曰魯人聞余出喜於徵死何暇追余從
者曰嘻速駕公歛陽在公歛陽請追之孟孫弗許陽
欲殺桓子孟孫懼而歸之子言辨舍爵於
季氏之廟而出陽虎入於謹陽關以叛

棘下杜注魯
城內地名

公羊

盜者孰謂陽虎也陽虎者曷為者也季氏之
宰也季氏之宰則微者也惡乎得國寶而竊之

陽虎專季氏季氏專魯國陽虎拘季孫孟氏與叔孫
氏迭而食之賊而鉸其板曰某月某日將殺我於蒲
圃力能救我則於是至乎日若時而出臨南者陽虎
之出也御之於其乘焉季孫謂臨南曰以季氏之世
世有子子可以不免我死乎臨南曰有力不足臣何
敢不勉陽越者陽虎之從弟也為右諸陽之從者車

數十乘至於孟衡臨南投策而墜之陽越下取策臨南駟馬而由乎孟氏陽虎從而射之矢著於莊門然而甲起於琴如弑不成却反舍於郊皆說然息或曰弑千乘之主而不克舍此可乎陽虎曰夫孺子得國而已如丈夫何賊而曰彼哉彼哉趣駕既駕公歛處父帥師而至懂然後得免自是走之晉

穀梁

寶玉者封圭也大弓者武王之戎弓也周公受賜藏之魯非其所以與人而與人謂之亡非其

所取而取之謂之盜

集說

杜氏預曰盜謂陽虎也家臣賤名氏不見故曰盜孔氏穎達曰傳言陽虎取寶玉大弓以出

是盜謂陽虎也寶玉大弓必是國之重寶歷世掌之故自劉歆以來說左氏者皆以爲夏后氏之璜封父之繁弱成王所以分魯公也公羊傳曰寶者何璋判白弓繡質龜青純彼不知魯有先王分器繆為言耳

且所盜無龜知其竝是妄也陸氏淳曰趙子曰寶
玉大弓無用之物陽虎竊取欲令後代知之以為榮
故曰盜予謂此玉與弓魯本受封之重器若失之必
合書於經虎又家臣不合書名故依例書為盜而云
懲其求名殊非也本取國重寶將以賂外國以求容
耳徐思知其不義之甚故歸之豈有求名之理乎
胡氏寧曰先王分器不能謹守而盜得竊諸公宮此
無政之驗也故失地則諱失寶玉大弓則書失之書
得之書重其事也陳氏傳良曰虎陪臣也取周公
之分器以出魯莫之禁書曰盜竊寶玉大弓魯無人
之辭也是故陪臣皆不書書陽虎為盜是治陪臣也
君子之作春秋治至於陪臣斯極矣黃氏仲炎曰
春秋書盜者不罪為盜而罪致盜也使為國者紀綱
素立刑政素明則安有盜竊公行之事哉今陽虎以
陪臣之賤行亂於國中脫甲公宮竊魯先君之分器
以出則魯之無紀綱刑政於此極矣故書曰盜竊寶

王大弓非徒罪分器亡也罪紀綱刑政之亡焉爾
李氏廉曰謝氏云寶玉象德大弓象武先公以文德
武功受此寶玉歷世守而傳之以為國之寶鎮國之
寶鎮盜得而竊焉則人君不能守其國子孫不能保
其鎮可知矣汪氏克寬曰何休謂季氏逐昭公取
寶玉藏於其家陽虎拘季孫奪其寶玉然昭公之經
不書失寶玉而此書盜竊則陽虎
竊取於公宮而非取之於季氏也

附錄左傳

鄭駟歆嗣子
大叔為政

庚敬王十
子九年

九年

晉定十一年齊景四十七年衛靈三十
四年蔡昭十八年鄭獻十三年曹伯陽

元年陳閔公越元年杞僖五年宋景十六年
秦哀三十六年楚昭十五年吳闔廬十四年

春王正月

附錄左傳

九年春宋公使樂大心盟於晉且逆樂祁之尸辭僞有疾乃使向巢如晉盟且逆子

梁之尸子明謂桐門右師出曰吾猶衰經而子擊鐘何也右師曰喪不在此故也既而告人曰已衰經而生子余何故舍鐘子明聞之怒言於公曰右師將不利戴氏不肯適晉將作亂也不然無疾乃逐桐門右師鄭駟欲殺鄧析而用其竹刑君子謂子然於是不忠苟有可以加於國家者棄其邪可也靜女之三章取彤管焉竿旄何以告之取其忠也故用其道不棄其人詩云蔽芾甘棠勿剪勿伐召伯所茇思其人猶愛其樹況用其道而不恤其人乎子然無以勸能矣

夏四月戊申鄭伯蠆卒

蠆敕邁反公作蠆

得寶玉大弓

左傳

夏陽虎歸寶王大弓六月伐陽關陽虎使焚萊門師驚犯之而出奔齊請師以伐魯曰三加必

取之齊侯將許之鮑文子諫曰臣嘗為隸於施氏矣魯未可取也上下猶和衆庶猶睦能事大國而無天菑若之何取之陽虎欲勤齊師也齊師罷大臣必多死亡已於是乎奮其詐謀夫陽虎有寵於季氏而將殺季孫以不利魯國而求容焉親富不親仁君焉用之君富於季氏而大於魯國茲陽虎所欲傾覆也魯免其疾而君又收之無乃害乎齊侯執陽虎將東之陽虎願東乃囚諸西鄙盡借邑人之車鑿其軸麻約而歸之載蔥靈寢於其中而逃追而得之囚於齊又以蔥靈逃奔宋遂奔晉適趙氏仲尼曰趙氏其世有乎亂

公羊

何以書國寶也喪之書得之書

胡傳

穀梁子曰寶王封圭大弓武王之戎弓周公受賜藏之魯或曰夏后氏之璜封父之繁弱也子

孫世守罔敢失墜以昭先祖之德存肅敬之心耳古者告終易代弘璧琬琰天球夷玉兇之戈和之弓垂之竹矢莫不陳列非直為美觀也先王所寶傳及其身能全而歸之則可以免矣魯失其政陪臣擅權雖先公分器猶不能守而盜得竊諸公宮其能國乎故失之書得之書所以譏公與執政之臣見不恭之大也此義行則有天下國家者各知所守之職不敢忽矣

集說

趙氏匡曰穀梁云不地羞也案緣未出境而得故但以得為名且書竊猶不羞書地有何羞乎

見也

孫氏復曰不曰盜歸寶王大弓者盜微賤不可再

也凡獲器用曰得得用焉曰獲非也向曰竊者失之也今曰得者得之也失得相對言得所以見失也若

器必言得郤大鼎何以云取乎器用不專言得亦明矣杜氏諤曰魯不能保守國器以致失今得而復書之不正其得之於盜也直書曰得以明其失而復得也高氏閌曰書得寶王大弓以見器之空還而不獲盜者以正典刑則亦幸而得之爾盜竊之罪於誰責而可乎萬氏孝恭曰寶王大弓三傳之說不同然聖經之大法不在乎是所以謹其盜竊與得之而已夫先王分寶玉於伯叔之國宜世守勿失而定公見竊於陪臣迨夫陽虎以為無益於近用祇以為名而自歸之魯有四封而詰其盜不得其盜以正國之典刑僅得寶王大弓政刑之失一至於此豈不重可憐邪噫納莒僕之寶玉曷若不失此分器之寶玉反楚靈之大屈曷若不失此分物之大弓始也貪人之所有今不能保已之所有故春秋譏之李氏廉曰陸例曰用力禽之曰獲獲人獲獸是也非用力禽之曰得得寶玉是也汪氏克寬曰杜預謂國之分

器得之足以為榮故重而書之案失之固足以為辱然得之於盜不能討其罪未足為榮適以彰其失之之恥耳邵氏實曰陽虎既竊寶玉大弓魯何以復得之殆虎遺於道路以為緩追之計也追者得之以歸故府故書曰得幸之也抑有遺恨焉耳

六月葬鄭獻公

集說

杜氏預曰三月而葬速

秋齊侯衛侯次于五氏

五氏杜注晉地蓋晉大夫邯鄲午之私邑今直隸廣平府邯鄲

縣西有五氏城亦曰寒氏城

左傳

秋齊侯伐晉夷儀敝無存之父將室之辭以與其弟曰此役也不死反必娶於高國先登求自

門出死於雷下東郭書讓登犂彌從之曰子讓而左
我讓而右使登者絕而後下書左彌先下書與王猛
息猛曰我先登書歛甲曰曩者之難今又難焉猛笑
曰吾從子如騂之靳晉車千乘在中牟衛侯將如五
氏卜過之龜焦衛侯曰可也衛車當其半寡人當其
半敵矣乃過中牟中牟人欲伐之衛褚師圍亡在中
牟曰衛雖小其君在焉未可勝也齊師克城而驕其
帥又賤遇必敗之不如從齊乃伐齊師敗之齊侯致
襦媚杏於衛齊侯賞犂彌犂彌辭曰有先登者臣從
之替幘而衣狸製公使視東郭書曰乃夫子也吾貺
子公賞東郭書辭曰彼賓旅也乃賞犂彌齊師之在
夷儀也齊侯謂夷儀人曰得敝無存者以五家免乃
得其尸公三襚之與之犀軒與直蓋而
先歸之坐引者以師哭之親推之三

中牟杜注滎陽有中牟縣迴遠疑非也索隱曰此
中牟當在河北非鄭之中牟也正義蕩陰縣西有

牟山中年蓋在其山之側今河南彰德府湯陰縣西有中年城在牟山下正當衛走邯鄲之道是其

地也

媯杜注齊西界當在濟南禹城

縣

杏杜注齊西界當在東昌博平縣

集說

杜氏預曰不書伐者諱伐盟主以次告

胡氏

銓曰春秋有書師次者有書君次者書師次惡

其勞師徒也書君次惡其遠民社也國君無王命而

遠民社危可知矣陳氏傳良曰外會書次自厥貉

以來未之有也於是再見其再見何列國無伯也齊

衛伐盟主則其不書伐春秋重絕晉也於襄之二十

三年嘗書齊伐晉至是而不書何齊始叛晉諸侯猶

有盟主也前年鄭叛晉盟齊于鹹衛叛晉盟齊于沙

明年及齊平魯亦叛晉諸侯無盟主矣有盟主非美

事也無盟主非細故也是故春秋重絕晉也任氏

公輔曰此伐晉也不書伐而書次者晉實大國未敢

輕伐始盟于沙中次于五氏又次于垂葭又次于渠

蔭至哀元年而後伐其欲有所逞也久矣李氏廉
曰齊衛三次而後伐胡氏無傳蓋同前次而後伐罪
其色藏禍心之義也謝氏以為罪其無事而出故書
次則又與無名妄動之例同矣要之二例皆可通而
陳氏說又得聖人之微意季氏本曰自盟沙衛人
叛晉晉不忘討而衛與齊合將欲備之此所以有五
氏之次王氏錫爵曰如五氏齊衛伐晉也春秋不
書伐而書次何也蓋齊衛雖有玩晉之心而晉力尚
彊未敢顯言伐之故二國不以伐為告而春秋亦因
其告而書之以示存晉之意云嚴氏啓隆曰經自
師次于成以下單書次者鮮矣定公之季乃三書次
就傳言之未有得其要領者也夫經言公次于滑師
次于郎師次于成又次于鼐北次于陘次于匡次于
厥貉次于雍榆言次則非伐言伐則非次可知而傳
乃曰齊侯伐晉夷儀且先登則其告於諸侯者直言
伐晉取夷儀可已胡復仍以次聞乎蓋齊衛叛晉而

晉勢尚彊未可輕伐將以觀釁於夷儀而未能聊次五氏以聲之耳

秦伯卒冬葬秦哀公

集說

許氏翰曰秦自晉悼以後浸不見於春秋則知秦益退保西戎軍旅禮聘之事不交於列國矣

辛敬王二十

十年

晉定十二年齊景四十八年衛靈三十五年蔡昭十九年鄭聲公勝元年曹陽

二年陳閔二年杞僖六年宋景十七年秦惠公元年楚昭十六年吳闔廬十五年

春王三月及齊平

左傳

十年春及齊平

集說

范氏甯曰平前八年再侵齊之怨李氏廉曰謝氏云前此魯數侵齊齊數伐魯至孔子為相

與齊釋怨相平而齊受之故魯及齊平平一國所願
故不稱公暨齊平者彼欲平而我與之平也及齊平
者我欲平而彼從我平也孔子之相魯也以德親懷
鄰國講信修睦而二國於此平焉能循其道則雖天
下之大可得而平也豈獨一齊國哉宋楚其平起於
下故書人齊魯其平起於上故書國此說固佳然汲
汲而平恐亦非聖人之意湛氏若水曰書及齊平
善釋怨也孔子為政於魯釋怨以安民也於是再侵
齊之怨平矣季氏本曰孔子用魯務講信修睦如
此卓氏爾康曰齊以魯事晉七八年兩伐魯魯亦
兩侵之此時用魯惟平齊從晉為救時用世第一務
及齊平見魯之睦鄰非復如前日之用兵矣孔子用
魯其施
為如此

夏公會齊侯于夾谷公至自夾谷

夾公穀作頰
杜注即祝其也
夾谷地理

志濟南淄川縣西南三十里有甲山亦名夾山一名祝山上有夾谷臺為定公會齊侯處案齊魯兩君相會不應去齊若此之近去魯若此之遠今萊蕪縣有夾谷峪名勝志以為萊兵劫魯侯處庶幾近之

集說

趙氏匡曰經不書盟傳何得云盟蓋左氏欲以歸汶陽之田歸功於夫子故謬為此說殊不知

要而得之非聖人之正也八年公會晉師于瓦亦致又何危

劉氏敞曰穀梁曰離會

乎且如穀梁所說頰谷之會聖人相之齊侯震懼歸地謝過齊則危矣魯何危乎又曰其以地致危之也

亦非也兩國會盟致皆以地此常例爾何說危哉

黃氏仲炎曰夾谷之會彼俗儒者竊意聖人舉動宜

夏異乎常人況儻相會同必有赫赫之效於是侈張其狀如所謂視歸乎齊侯命司馬行法斬優施却萊夷索汶陽田等事皆不足信之談爾使實可信則仲尼之智數風采不過如魯曹沫趙簡相如能面折齊

秦之君於柯澠池之事似非聖人氣象也方齊景公欲攘晉之霸急於求諸侯以魯未附齊故成仇敵今既平而會將善魯以勸來者何至以兵劫魯侯也況魯政制於三家而魯侯特擁虛器於其上爾齊劫魯侯亦何為者通春秋考之齊侯會盟多矣固未嘗有衷甲之變也今觀左氏載犂彌言於齊侯曰孔丘知禮而無勇若劫之必得志則是魯用孔子反為齊人所輕而召其變也汲黯在朝淮南為之寢謀司馬輔政遼人戒其邊吏國有君子固敵國姦人之所敬憚也曾謂聖人相魯乃不逮是就使齊人果有衷甲之變而聖人處此豈無理義之論足以愧之如燭之武之解鄭圍展喜之却齊寇從容辭氣化暴為仁亦何至疾聲厲色以兵刃為威以敢殺為能以求索為功哉由此觀之凡侈言夾谷之功者皆淺心陋識未聞孔子之道者也王氏樵曰案陽虎奔齊請師以伐魯齊侯將許之以鮑文子之諫而止至是魯之君臣

能用孔子魯國大治齊人慕義故今年三月及齊平而為夾谷之會焉安得有使萊人以兵劫魯侯之事乎是會也聖人相禮將使兩國繼好謀闕敦於信義以從先王之典何以盟為經言會而傳言盟足知其誣也其盟辭曰齊師出竟而魯以三百乘從是欲以邾滕視魯也及魯使茲無還答之則要其反我汶陽之田而已何其不倫乎使齊反汶陽之田則魯將為齊役乎卓氏爾康曰齊欲結魯以伐晉也或曰魯欲叛晉而從齊非也夫子當國叛晉之說非所出也蓋將平齊從晉以靖列國耳嚴氏啓隆曰齊魯相仇始於陽虎虎敗則及齊平會于夾谷始平齊也其時即微孔子齊亦必平孔子自攝相自成禮而還耳以為聖人之奇績而曰萊人以兵劫魯侯抑何不根之甚哉余氏光曰葉石林云夾谷之事匹夫之勇知者不為而曾謂仲尼為之乎晦翁亦力辨此事為附會

案齊魯世為婚姻為日久矣自定公即位之後日尋
干戈侵伐不已孔子當國首以講信修睦為事故有
夾谷之會齊景方志在求伯亦欲親魯以為之援遂
懽然釋向來之憾而以鄆謹龜陰來歸洵聖德之所
孚也左氏穀梁載萊兵劫魯侯優施舞幕下之事史
記家語亦皆侈大其辭蓋欲歸功於孔子而附會之
也夫聖人言語氣象自有以感人於周旋揖讓之間
而鄙倍暴慢一時俱化必無兩君好會之地遽行誅
戮之理左氏曰士兵之穀梁曰使司馬行法焉此武
夫鬪力者之所為而敢以誣聖人乎齊師出竟而要
魯以三百乘從是齊以縣鄙視魯也卑魯實甚聖人
必以禮拒之安肯請汶陽之田而勞吾民以奉鄰國
況汶陽既歸魯當共命何以終定公之世盟黃會牽
屢書於冊而不聞魯為齊役乎垂葭之役齊師出竟
矣魯未嘗以三百乘從也朱子以此事為附會而
先儒亦多疑之故刪左氏及穀梁而胡傳亦不錄

晉趙鞅帥師圍衛

左傳

晉趙鞅圍衛報夷儀也初衛侯伐邯鄲午於寒氏城其西北而守之宵燭及晉圍衛午以徒七

十人門於衛西門殺人於門中曰請報寒氏之役涉佗曰夫子則勇矣然我往必不敢啓門亦以徒七十人旦門焉步左右皆至而立如植日中不啓門乃退反役晉人討衛之叛故曰由涉佗成何於是執涉佗以求成於衛衛人不許晉人遂殺涉佗成何奔燕君子曰此之謂棄禮必不鈞詩曰人而無禮胡不遄死遄矣哉

邯鄲杜注廣平縣也今直隸廣平府邯鄲縣西南有邯鄲故城即俗名趙王城是也寒氏杜注即

五氏

集說

許氏翰曰使晉有以報齊則衛可無用兵而服也今圍衛而不能服則徒足以堅齊之從而已

矣

趙氏

鵬飛

曰討五氏之次也

然不討齊而圍衛

李氏

廉曰以伯主而圍與國

者惟宋襄圍曹趙鞅圍衛而已

晉自召陵以後凡用

兵書侵以義之不足以服人也

此役書圍以力之不

者惟宋襄圍曹趙鞅圍衛而已

晉自召陵以後凡用

兵書侵以義之不足以服人也

此役書圍以力之不

足以服人也

湛氏若水曰志報怨之兵也

李氏

本曰圍衛欲其離齊黨也而卒不能服晉衰可知矣

齊人來歸鄆謹龜陰田

杜注三邑皆汶陽田泰山博縣

齊人來歸鄆謹龜陰田

杜注三邑皆汶陽田泰山博縣

北有龜山陰田在其北也

案博縣今之泰安州州境

無龜山今龜山在新泰縣之西南泗水縣之東北蓋

與泰安州相接也

公羊

齊人曷為來歸鄆謹龜陰田孔子行

乎季孫三月不違齊人為是來歸之

欽定春秋傳說彙纂

十九

胡傳齊人前此嘗歸濟西田矣後此嘗歸謹及聞矣而此獨書來歸何也曰歸者魯請而得之也曰

來歸者齊人心服而歸之也

集說

杜氏預曰會夾谷孔子相齊人服義而求歸之故書來歸高

氏閔曰孔子夾谷之事人可能也而使大國失守悔過効順所不可能也此修誠之至崇德之素感於其

人之天譬如干羽格有苗非任智者所能測也胡氏寧曰言來歸者彼自來也不言來者請而得之耳

陳氏傅良曰未有言來歸田者言來歸必自外至如鄭來歸祊及齊來歸衛寶是也鄭謹龜陰田言來

歸以是為齊人之願也濟西言取謹闡言取鄭謹龜陰不言取以是為齊人之願則猶齊田也故從外來

常文與歸衛寶同齊彊於天下伐盟主合諸侯於鄆陵矣於是願歸田則以孔子相夾谷之會也謂春秋

之諸侯不足用為善者是不即人心之論也故曰如
有用我者期月而已可也家氏鉉翁曰取濟西取

汶陽書取不言歸以其仗大國而得歸故書曰取歸
濟西歸謹及闡歸疆也言歸不言來歸以其請之而
後得非彼自以歸也惟鄆謹龜陰之歸書齊人來歸
言齊人自以故疆來歸非假兵力智計而得之是之
謂自歸視其他歸疆有不得同也聖人道化所感疆
暴為之革心有莫知其然而然者讀春秋至此可以
信聖人之道不為空言儒者之學果非無實也左氏
所載茲無還之對陋矣李氏廡曰孔子是年為大
司寇十二年使仲由為季氏宰墮三都蓋聖人以王
道化齊而齊景服義以王道用魯而三家墮邑所謂
變齊變魯之幾畧見於此汪氏克寬曰自來曰來
猶來聘來朝之類齊人感夫子之義而歸侵田此綏
之斯來之效也

叔孫州仇仲孫何忌帥師圍郈

郈音后又下邁反

左傳

初叔孫成子欲立武叔公若藐固諫曰不可成子立之而卒公南使賊射之不能殺公南為馬

正使公若為郈宰武叔既定使郈馬正侯犯殺公若弗能其圉人曰吾以劒過朝公若必曰誰之劒也吾稱子以告必觀之吾偽固而授之末則可殺也使如之公若曰爾欲吳王我乎遂殺公若侯犯以郈叛武叔懿子圍郈弗克

集說

杜氏預曰犯以不能副武叔之命故叛湛氏若水曰二子之圍郈為侯犯據郈以叛也侯犯

之叛為殺公若也公若之見殺為固諫立武叔也夫天下有道征伐自天子出天下無道征伐自諸侯出諸侯失政征伐自大夫出則陪臣亦叛之矣今叔孫仲孫上不能事其君下不能御其臣擅興大眾自圍

其邑而猶不克焉則魯之無道從可見矣

秋叔孫州仇仲孫何忌帥師圍郕郕公作費

左傳

秋二子及齊師復圍郕弗克叔孫謂郕工師赤曰郕非唯叔孫氏之憂社稷之患也將若之

何對曰臣之業在揚水卒章之四言矣叔孫稽首赤謂侯犯曰居齊魯之際而無事必不可矣子盍求
事於齊以臨民不然將叛侯犯從之齊使至郕人為之宣言於郕中曰侯犯將以郕易於齊齊人
將遷郕民衆兇懼侯犯曰衆言異矣子不如
易於齊與其死也猶是郕也而得紓焉何必此齊人
欲以此逼魯必倍與子地且盍多舍甲於子之門以
備不虞侯犯曰諾乃多舍甲焉侯犯請易於齊齊有
司觀郕將至駟赤使周走呼曰齊師至矣郕人大駭
介侯犯之門甲以圍侯犯駟赤將射之侯犯止之曰

謀免我侯犯請行許之駟赤先如宿侯犯殿每出一
門郈人閉之及郭門止之曰子以叔孫氏之甲出有
司若誅之羣臣懼死駟赤曰叔孫氏之甲有物吾未
敢以出犯謂駟赤曰子止而與之數駟赤止而納魯
人侯犯奔齊
齊人乃致郈

宿杜注故宿國隱元年
及宋人盟于宿即此

胡傳郈叔孫氏邑也侯犯以郈叛不書於策書圍郈
則叛可知矣再書二卿帥師圍郈則彊亦可知

矣天子失道征伐自諸侯出而後大夫彊諸侯失道
征伐自大夫出而後家臣彊其逆彌甚則其失彌速
故自諸侯出十世希不失矣自大夫出五世希不失
矣陪臣執國命三世希不失矣三家專魯為日已久
至是家臣爭叛亦其理宜矣春秋制法本忠恕施諸
已而不願亦勿施於人故所惡於上不以使下所惡

於下不以事上二三子知傾公室以自張而不知家
隸之擬其後也凡此類皆據事直書深切著明矣

集說

孫氏復曰郈叛叔孫州仇仲孫何忌帥師圍之
郈不服故二卿秋再圍杜氏諤曰大夫攻叛

邑自夏至秋再圍以兵春秋離其文而書之不待貶
而貶著也朱子曰春秋之初只是諸侯抗衡後來
諸侯纔不奈何便被大夫專權及大夫稍沒奈何又
被陪臣擅命如唐之藩鎮其初是節度抗衡後來牙
將孔目官虞候之屬皆殺了節度亦來握權夫子說
禮樂征伐自天子出一章極分曉家氏鉉翁曰侯
犯據郈而叛既而以邑奔齊齊受侯犯以郈歸魯前
歸汶陽今復歸郈此聖人道化所感不然齊何有於
叔孫哉汪氏克寬曰魯以諸侯而僭天子三桓以
大夫而專魯侯犯以家臣而叛叔孫皆上行而下效
也叔孫不知改過遷善退守臣職使家隸感化而帥
重師以圍其邑又不能暴明其罪討而誅之乃使犯

之僚屬駟赤多方為詐諛之謀誘之出走是教通國之人習為罔上之舉也失政刑矣談詭欺誣偽不誠下執此以叛其上上執此以危其下雖幸勝之其何以保有國家乎

宋樂大心出奔曹

集說王氏葆曰宋公信讒而刑罰無章固可罪矣然大心不能任家國之難而進退無據且挾詐以

避事豈能自安乎故經亦直書以志其過季氏本曰宋景公寵用桓魋諸卿離心君臣迹睽故聞子明譖大心而逐之而大心以國卿之重挾詐不忠安保其不為亂哉

宋公子地出奔陳

地公作池後同

左傳

宋公子地嬖蘧富獵十一分其室而以其五與之公子地有白馬四公嬖向魋魋欲之公取而

朱其尾鬣以與之地怒使其徒扶魑而奪之魑懼將走公閉門而泣之目盡腫母弟辰曰子分室以與獵也而獨卑魑亦有頗焉子為君禮不過出竟君必止子公子地出奔陳公弗止

集說

王氏葆曰君雖不君臣不可以不臣若地者亦驕伉矣故春秋以自奔為文家氏鉉翁曰宋

大夫公子母弟奔者三樂大心以讒逐也公子地以嬖臣故翦公族也公弟辰為地請留不許亦以嬖臣奔也奔者固有罪宋景亦少恩矣李氏廉曰經書公子地宋公之弟辰左氏亦止稱公子地母弟辰是未嘗直指地為景公弟也杜氏因辰有廷吾兄之說遂直指地為景公之弟辰之兄若然則書法何以一則曰公子一則曰弟乎竊疑公子地以輩行雖為景之弟而其實非同父之弟也

冬齊侯衛侯鄭游速會于安甫

安甫公作鞏
安甫杜注地闕

集說

家氏鉉翁曰前此齊與鄭衛盟鹹盟沙矣今而三國復為此會無所憚於晉矣前此魯受命於

晉而以兵加衛今而盟夾谷棄晉不復顧矣然諸侯雖叛晉而齊亦不能因諸侯之從而復霸也李氏

廉曰謝氏云會于安

甫以衛有晉難也

叔孫州仇如齊

左傳

武叔聘於齊齊侯享之曰子叔孫若使邠在君

之對曰非寡君之望也所以事君封疆社稷是以敢以家隸勤君之執事夫不令之臣天下之所惡也君

豈以為寡君賜

集說

杜氏預曰謝致邠也齊以致邠德叔孫叔孫言義在討惡非所以賜寡君高氏閌曰夾谷之

會歸我鄆謹龜陰田侯犯以郕奔齊
齊人又致郕是以叔孫如齊謝焉

宋公之弟辰暨仲佗石彊出奔陳

暨字下公穀有宋字彊苦侯反

左傳

辰為之請弗聽辰曰是我廷吾兄也吾以國人出君誰與處冬母弟辰暨仲佗石彊出奔陳

胡傳

其弟云者罪宋公以嬖難故以失二弟無親親之恩暨云者罪辰以兄故帥其大夫出奔無尊

君之義夫暨者不得已之辭又以見仲佗石彊見脅於辰不能自立無大臣之節也

集說

劉氏敞曰杜云稱弟示首惡也案隱元年之例段不弟故不言弟然則辰亦不弟者不稱弟可

也反以見首惡稱弟何哉段不言弟反非首惡乎又曰何休曰辰言暨者明仲佗石彊彊與俱出非也若如休所言辰罪為輕何故反序上乎又何為明年入于蕭而書及乎黃氏仲炎曰宋公以私寵向魋之

故使其母弟國卿羣然奔叛蓋君不君則臣不臣也
家氏鉉翁曰辰於君為同母弟而地則衆公子也
景公以嬖臣之故而奔其二弟辰以地故而自絕於
君兄又率仲佗石彊與之偕行佗彊身為卿佐有君
不事而與辰俱奔兄不友弟不
悌臣不忠此一書而竝貶也

壬敬王二十一年

十有一年

晉定十三年齊景四十九年衛靈
公三十八年蔡昭二十年鄭聲二年

曹陽三年陳閔三年杞僖七年宋景十八
年秦惠二年楚昭十七年吳闔廬十六年

春宋公之弟辰及仲佗石彊公子地自陳入于蕭以叛

蕭杜注宋邑孔疏蕭叔大心者宋蕭邑大夫平宋亂
立桓公宋人以蕭邑封叔為附庸宣十二年楚滅之

復為
宋邑

集說

劉氏敞曰穀梁云辰未失其弟也非也公子不去國而辰棄親出奔挾黨為亂以謂未失其弟

何妄甚也

趙氏

鵬飛

曰出奔書暨辰彊之也二子

有所不得已也

入

叛書

及辰主也二子悅從之也難

乎奔而易於

叛

仲石

固庸

臣乎

初而

奔也

則疑

謀有

所不濟故難

以暨

之今

而叛

也以為

事無

有不

捷故

有

易而及之

奔固

不難

而叛

何捷

吾於

此知

仲石

誠庸

夫也

家氏

鉉翁

曰克

段不

書弟

志在

於篡

絕之

於

天倫也

辰以

憤激

不平

而出

其罪

下於

段仍

書弟

實叛也

前書

暨此

書及

暨者

不得已

之辭

及者

從之

然

者

也

案

自陳

入蕭

辰之

意主

於叛

而仲

石與

地則

從之

者

也

故經

文書

及胡

傳以

不稱

暨而

稱及

為無

首從

之

別

失經

旨矣

夏四月

秋宋樂大心自曹入于蕭

左傳

春宋公母弟辰暨仲佗石彊公子地入于蕭以叛秋樂大心從之大為宋患寵向魍故也

胡傳

四卿在蕭以叛而大心自曹從之其叛可知矣故不書叛而曰入于蕭入逆辭也書自陳自曹

者結鄰國以入叛陳與曹之罪亦著矣

集說

杜氏預曰入蕭從叛人叛可知故不書叛季氏本曰暨者以此彊彼之辭及者以此及彼之

辭奔陳稱暨入蕭以叛稱及可見仲佗石彊之叛乃其所欲但以辰主謀故以為首惡耳稱自因其力也

冬及鄭平叔還如鄭洺盟

還音旋洺公穀作莅

左傳

冬及鄭平
始叛晉也

集說

杜氏預曰平六年侵鄭取匡之怨魯自僖公以來世服於晉至今而叛故曰始孔氏穎達曰

世族

譜云叔還叔弓曾孫也又世本云叔弓生定伯

閔閔

生西巷敬叔叔生成子還還為叔弓曾孫許

氏翰

曰夫晉之為晉自若也定亦未有他惡而諸侯

離心

者政在多門貨賄譏慝汨昏其間則無以令天

下極

於執樂祁犁也陳氏傅良曰書翰平以志諸

侯之

合書及鄭平以志諸侯之散此春秋之所以始

終也

家氏鉉翁曰自文公之霸魯常事晉中間雖

即楚

即齊而不敢顯然與晉絕去年及齊平今又及

鄭平

既背晉不得不樹黨以自固焉耳吳氏澂曰

及鄭

平者我欲之故鄭卿不來盟而我卿往涖盟也

李氏

廉曰晉伯至此諸侯皆叛矣然魯叛晉本始

於平

齊之時不於平齊言叛晉者蓋春秋之間魯於

齊晉本兩事之也此條當與鄭輸平同看季氏本
曰昔魯親晉而鄭附齊魯與齊平鄭亦平矣既平然
後涖盟郝氏敬曰魯自僖公以來七世事晉晉黨
季孫逐昭公識者知晉之將失魯矣及韓范內闕同
盟解體齊張於東鄭衛先往故魯有夾谷之會然猶
未顯與晉絕也至是魯鄭同盟四國之好成晉遂失
諸侯不可復收矣

癸敬王二十有二年晉定十四年齊景五十年衛靈三
十七年蔡昭二十一年鄭聲三年

曹陽四年陳閔四年杞僖八年宋景十九
年秦惠三年楚昭十八年吳闔廬十七年

春薛伯定卒

集說劉氏敬曰何休曰不日月者子無道當廢之而
以為後未至三年失衆見弑故畧之推此言也

而觀之其妄可勝記乎且公羊曰立嫡以長不以賢
蓋防亂也如休所言更相違矣汪氏克寬曰在位
十三年子比嗣季氏本曰
卒不訃併月不知故止書春

夏葬薛襄公

集說

高氏閌曰春秋書薛卒者三
葬者不日不月史文畧也

叔孫州仇帥師墮郈

墮許規
反後同

集說

杜氏預曰墮毀也患其險固故墮壞其城孫
氏覺曰是時三桓之邑皆為城以自固故其家

臣因之以叛於是墮毀之也趙氏孟何曰州仇曷
為自墮其邑除家臣之患也家臣為患之日久矣陽
虎作難囚季孫居鄆陽關以叛三家幾不免焉侯犯
以郈叛叔孫與仲孫帥師圍郈不克再圍之侯犯以

郈奔齊齊人乃致郈而侯犯猶在齊也時邑宰數叛魯卿患之孔子方仕於朝而仲由為季氏宰建墮三都之議以絕陪臣之禍故叔孫首帥師墮郈卿易墮也季氏本曰侯犯既奔齊則郈可不假叔孫之力而墮矣必師者恐餘黨有變也

衛公孟彊帥師伐曹

彊苦侯反

左傳

夏衛公孟彊伐曹克郊還滑羅殿未出不退於列其御曰殿而在列其為無勇乎羅曰與其素

厲寧為無勇

郊杜注曹邑當在山

東兗州府曹縣界

集說

杜氏預曰彊孟縶子孔氏穎達曰世族譜云孟縶無子靈公以其子彊為之後也為後則為

其子故曰孟縶子家氏鉉翁曰此及十三年再書
衛彊伐曹者著列國無盟主也李氏本曰是時曹
伯陽好田弋公孫彊為政又
非睦鄰者衛必有辭於伐矣

季孫斯仲孫何忌帥師墮費

費音秘下同

左傳

仲由為季氏宰將墮三都於是叔孫氏墮邱季氏將墮費公山不狃叔孫輒帥費人以襲魯公

與三子入於季氏之宮登武子之臺費人攻之弗克入及公側仲尼命申句須樂頎下伐之費人北國人追之敗諸姑蔑二子奔齊遂墮費

姑蔑魯地隱元年盟于蔑即此括地志姑蔑故城在泗水縣東四十五里今屬兗州府故城在縣治東南

公羊

曷為帥師墮邱帥師墮費孔子行乎季孫三月

邱帥師墮費雉者何五板而堵五堵而雉百雉而城

胡傳

禮曰制國不過十乘都城不過百雉家富不過

無百雉之城禮所當謹也邱費成者三家之邑政在大夫三卿越禮各固其城公室欲張而不得也三桓既微陪臣擅命憑倚其城數有叛者三家亦不能制也而問於仲尼遂墮三都是謂以禮為國可以為之兆也推而行諸魯國而準則地方五百里凡侵小而得者必有興滅國繼絕世之義諸侯大夫各謹於禮不以上所惡於上者使其下亦不以上所惡於下者事其上上下下交相順而王政行矣故曰苟有用我者期月而可三年有成

集說

劉氏絢曰三家不能制至屢圍而不克帥師而後墮成疆而不服公圍而不克有天下而不謹

於禮末流之患可勝言哉

王氏葆曰墮郈以一卿墮費以二卿者費彊於郈故也

高氏閔曰墮邑而

至於帥師是邑之力足以抗也

朱子曰墮邑之事

孔子因其機而為之若漸漸掃除得去其勢亦自削

弱可復正也又曰他合下只說得季桓子透桓子事

不信之所以做得後來被公歟處父一說破了桓子

便不信之陳氏傳良曰書叔孫墮郈季孫墮費以

是為二家之願也二家專魯出昭公矣於是願墮其

都則以孔子之相魯也謂春秋之大夫不足用為善

者是不即人心之論也張氏洽曰毀其所恃以為

固者所以制陪臣抑私家而復彊榦弱枝之勢也仲

由之舉此議蓋因南蒯侯犯之叛而為三家忠謀使

彊臣不敢恃彊以叛君陪臣不能負固以跋扈而上

下皆順然南蒯侯犯皆以叛為季孫叔孫之害故費

下皆順然南蒯侯犯皆以叛為季孫叔孫之害故費

郈皆墮獨公斂處父方恃彊以敗陽虎而孟孫用之
故成獨不服雖定公圍之而卒弗克也聖人雖用於
魯而季孫受女樂而違孔子孟孫惑於僞不知之說
陰與公斂處父比成既方命而聖人去魯豈非天哉
呂氏大圭曰三家之城其邑者將以自利也而家
臣據邑以叛亦豈三家之利哉南蒯叛侯犯叛公山
不狃叛叛者相踵豈惟魯國惡之三家亦惡之矣孔
子順天理而言之而適有動乎三家之心故其墮郈
墮費者二家之自墮也成邑不墮而至於圍則孟氏
之不欲墮爾夫二家聞夫子之言而墮其邑者是其
天理之萌也孟氏聞處父之言而不肯墮者是其人
欲之蔽也天理之萌不足以勝其人欲之蔽然後不
肯墮也使聖人得志以行乎魯國則將有不待兵革
而自墮者如魯之不終用孔子何李氏廉曰公羊
於齊歸田之下曰孔子行乎季孫三月不違於墮都
之下又云然疏曰不違有二案家語定十年孔子自

邑宰為司空十一年又從司空為司寇然則為司空之時能別五土之宜咸得其所為季孫所重是以三月不違齊人遂懼來歸四邑矣及作司寇之時攝行相事國無姦民七日誅少正卯政化大行季孫重之復不違三月於是有墮郈之事又曰孟子曰孔子於季桓子見行可之仕孔子仕於定公而言桓子何也朱子曰孔子之相皆由桓子及桓子受女樂孔子便行矣然孔子亦因其機而為之季氏是時自不奈陪臣何故假孔子之力以去之又呂氏曰聖人為政所謂立之斯立綏之斯來動之斯和聖人作而萬物覩同此心者孰不懷同此氣者孰不感仲由以勇銳兼人之資感於氣最先者首為墮都之議夫叔季二人亦非仲由所能令蓋聖人在上自有感動仲由特發之耳汪氏克寬曰史記家語曰孔子言於定公而使季氏宰仲由墮三都公羊云孔子行乎季孫告季孫而墮二邑左氏又云仲由為季氏宰將墮三都叔

孫自墮郈李氏將墮費費人襲魯仲尼命伐之遂墮費竊疑是時定公失政豈能命大夫墮邑蓋孔子以禮制感化季孫且使子路為之宰而後墮之耳所紀雖不同而以為聖人過化之功則一而已或謂叔季自墮其私邑於聖人無與然昭十二年南蒯以費叛前此十年侯犯以郈叛曷不以此時墮之而必待聖人之用於魯而後墮之耶

秋大雩

冬十月癸亥公會齊侯盟于黃

齊公作晉

集說

杜氏預曰結叛晉也作晉侯誤家氏鉉翁曰陽虎奔齊侯犯繼往

張氏洽曰黃齊地公羊

故彊家者懼甫盟夾谷又盟于黃耳汪氏克寬曰隱六年盟于艾齊魯為盟之始也繼而有瓦屋之參

盟于幽之同盟而齊霸遂成此盟于黃齊魯為盟之
終也固叛晉之交而晉不復能霸矣季氏本曰黃
之盟齊魯睦也蓋因孔子用魯政化大行有所感焉
然忌而沮之之意已問之矣女樂之歸其在此盟後
歟

十有一月丙寅朔日有食之

公至自黃

十有二月公圍成公至自圍成

左傳

將墮成公斂處父謂孟孫墮成齊人必至於北
門且成孟氏之保障也無成是無孟氏也子偽

不知我將不墮冬十

二月公圍成弗克

集說

杜氏預曰國內而書至者成彊若列國興動大衆故出入皆告廟

陸氏佃曰聖人之化既行

成雖未墮於魯何有遲之期年公歛陽情見勢屈墮之易耳定公何乃狃於速克躬駕以攻之輕於一出

無功而返此一役也吾知其未訪於仲尼抑李路亦未必在此行也

胡氏宏曰孔子為魯司寇墮三都

及成不墮三家之慮變矣故經文不言三家直書公

金氏履祥曰孔子生長於魯至是五十餘年魯之

君臣豈不知其賢而未嘗能用孔子也定公之十年一旦起而用之莫有知其由者孟子稱孔子於季桓

子見行可之仕也而論語謂季桓子受女樂不朝孔子行孔子此時之行藏繫季桓子之用舍蓋季氏專

魯而魯公無民久矣使魯之君而欲用孔子豈能遽奪季氏之權以畀孔子季氏亦豈肯避己之權以與

孔子哉自陽虎執桓子囚之而專魯政辱之於晉陷之於齊師且盟且詛又將饗而殺之懂而獲免當是

時非惟魯國不可為而季氏亦自不可支矣桓子於此謀所以為靖亂興衰之計故舉孔子於公而試用之已而政聲四達齊歸侵地於是攝行相事墮三都夫三都者三家彊邑也當是時公山弗擾在費而郈侯犯之亂未久也三家之有三都已非公室之便而三都之為三都至是亦非三家之便也故叔孫氏始墮郈繼而季桓子墮費已而孟孫氏不肯墮成圍之弗克其不肯墮成也公歛處父之言曰無成是無孟氏也然則無費是亦無季氏也而墮之當是時桓子之心未敢自計其私也夫三都已墮其二則成之不墮固亦未害然亦豈終不克墮哉夫子久之必有處矣既而魯國方治而齊人歸女樂以沮之夫使孔子上下之交方固桓子之志未移則一女樂豈足以間之季氏權臣也桓子舍已權以聽孔子而墮其名都以彊公室其中豈無介介者顧以衰敗之餘藉之振起為是降心以相從也今紀綱既定外侮既却魯既

治矣桓子豈甘於終絀者縱桓子甘之季氏私人必
有以為不利者故其信任之意必已漸衰特未敢驟
舍孔子而孔子顧亦無隙可行爾故齊人歸女樂以
從之夫齊何懼於我而歸女樂於事可疑於理不正
有國者固不可啗此為鄰國所覘也使桓子而猶惟
孔子之聽豈其受此受之已非矣而又君臣荒淫其
中三日不朝此其心術蠹壞不復可與有為而其心
固亦已無孔子矣故孔子去之此夫子出處之本末
情事也李氏廉曰案朱子語錄三家孟氏最弱季
叔為彊彊者墮之而弱者反不可墮者彊者不覺而
弱者覺之故也或問墮三都事費郈已墮而成不可
墮是不用夫子至於此否曰既不用卻何故圍成當
時夫子行乎季孫三月不違則費郈之墮出於不意
及公歛處父不肯墮成次第喚醒了叔季二家便做
這事不成又齊人以女樂歸之遂行不然當別有處
置也且費郈之叛薦為叔季之害故叔季自欲墮之

公歛在成方有功於孟氏則孟氏之不肯墮宜矣今案如公穀說則圍成非孔子意如朱子說則圍成之舉孔子未必不知之也夫負固弗服雖舜禹文王有所不免如三苗逆命有崇弗降始皆伐之至班師修德而自格圍之不克亦何損於聖人觀圍而不再伐安知非班師之意但仲尼不終用於魯故聖人之化不遂行而公室之威徒褻耳至胡氏所引史記明年孔子由大司寇攝相事至十四年然後行則恐未必然故胡氏宏曰夫聖人所以大過人者無他焉如天之生物隨其分限為委吏則必會計當為乘田則必畜養蕃為宰而親民則制為養生送死之節為司空而正封域則溝合昭公之墓為司寇而治姦亂則誅少正卯而墮三都及成不墮三家慮變矣故經文不言三家直書曰公聖人色斯舉矣安有明年由大司寇攝相之事所以必知其無者考案經文明年無更敗起廢之事而築園大蒐絕與墮都之意不侔故也

此說似得其實故魯世家亦以攝相誅少正卯與聞國政歸女樂孔子行等皆為十二年事也汪氏克寬曰穀梁云圍成大公也夫屈千乘之尊而親圍國中之一邑其小弱甚矣乃反以為大之乎又云何危爾邊乎齊也是時會夾谷盟黃齊魯交好不足危也其危之者定公沮辱於陪臣以得返為幸爾黃氏震曰三都若盡墮豈惟三家除跋扈之臣公室亦除三家之窟所謂惟禮可以已之若善行之公室可復張也郈費之墮非公之能也叔孫季孫憤家臣之叛已而自欲墮之也成之不果墮非公之不能也家臣與孟氏比而孟孫自不欲墮之也墮三都固子路之謀三都果墮亦孔子之願不幸事不竟世因以責子路譏定公而力言非孔子之心皆以成敗論也

甲敬王二十三年

十有三年

晉定十五年齊景五十一年衛靈公三十八年蔡昭二十二年鄭聲四

年曹陽五年陳閔五年杞僖九年宋景二十
年秦惠四年楚昭十九年吳闔廬十八年

春齊侯衛侯次于垂葭

穀無衛侯字葭公作瑕

左傳

十三年春齊侯衛侯次于垂葭實鄭氏使師伐
晉將濟河諸大夫皆曰不可邴意茲曰可銳師

伐河內傳必數日而後及絳絳不三月不能出河則
我既濟水矣乃伐河內齊侯皆斂諸大夫之軒唯邴
意茲乘軒齊侯欲與衛侯乘與之宴而駕乘廣載甲
馬使告曰晉師至矣齊侯曰比君之駕也寡人請攝
乃介而與之乘驅之
或告曰無晉師乃止

鄭氏杜注垂葭改名鄭氏高平鉅野縣西南有鄭
亭今屬兗州府濟寧州河內杜注汲郡案漢置

河內郡晉分置汲郡治
汲縣今為衛輝府治

集說

杜氏預曰二君將使師伐晉次垂葭以為援高氏閏曰書次垂葭與九年次五氏同家氏

鉉翁曰晉既失霸諸侯欲舉方伯連帥之事當請命於周告於諸侯孰不我從乃今日會某明日盟某又

明日次某欲以圖霸豈不難哉

夏築蛇淵囿

蛇淵囿水經注蛇水又西逕鑄城西左傳所謂蛇淵囿也京相璠曰濟北有蛇丘城

城下有水魯囿也今蛇丘城在濟南府肥城縣南

集說

杜氏預曰書不時也許氏翰曰魯政不修而非時勤民築囿奉己而已志不及國也夫圍成

不克歸而力此何振之有高氏閏曰魯國之囿一而已成築鹿囿昭築郎囿定築蛇淵囿何囿之多也

李氏廉曰此正與受女樂事相類定公君臣安知不自以為齊人已服彊都已墮國家閒暇可以般樂

乎此決非夫子為政時汪氏克寬曰昭九年郎圉之築雖當水星昏正農隙之時且書於策以示戒況盛夏耘耔農事方殷而役民以興苑囿不待貶絕而罪著矣昔叔孫昭子曰無囿猶可無民可乎於以見魯之無人益甚也季氏本曰孔子去而君臣志荒矣

大蒐于比蒲

毗比音

集說

高氏閌曰囿所以養禽獸待畋獵也築囿蛇淵今乃蒐于比蒲則囿何為哉魯既叛晉而三桓

日懼人之圖已故數蒐焉趙氏與權曰三家分軍私歛蒐閱軍實以自固也非時非制不足言也

衛公孟彊帥師伐曹

集說

高氏閌曰衛比伐曹曹不叛晉故也靈公志在軍旅之事而不知以禮為國故亟戰如此

秋晉趙鞅入于晉陽以叛

左傳

晉趙鞅謂邯鄲午曰歸我衛貢五百家吾舍諸

晉陽午許諾歸告其父兄父兄皆曰不可衛是

以為邯鄲而寘諸晉陽絕衛之道也不如侵齊而謀

之乃如之而歸之于晉陽趙孟怒召午而囚諸晉陽

使其從者說劍而入涉賓不可乃使告邯鄲人曰吾

私有討於午也二三子唯所欲立遂殺午趙稷涉賓

以邯鄲叛夏六月上軍司馬籍秦圍邯鄲邯鄲午荀

寅之甥也荀寅范吉射之姻也而相與睦故不與圍

邯鄲將作亂董安于聞之告趙孟曰先備諸趙孟曰

晉國有命始禍者死為後可也安于曰與其害於民

寧我獨死請以我說趙孟不可秋七月范氏

中行氏伐趙氏之宮趙鞅奔晉陽晉人圍之

穀梁

也叛者不以者也叛直叛也

胡傳

趙鞅之入拒范中行也而直書曰叛何也人臣專土與君為市則是篡弑之階堅冰之戒豈無

以有己之義乎後世大臣有困於讒間遷延居外不敢釋兵卒以憂死者亦未明人臣之義故爾故直書

入于晉陽以叛入者不順之辭叛者不赦之罪

集說

陸氏淳曰書曰叛者人臣不當專土也高氏閔曰據土背君曰叛鞅入晉陽以拒范中行而

不知投鼠忌器之義故聖人直名曰叛以著其不由君命專土與兵之罪陳氏傅良曰鞅非始禍曷為

皆以叛書之春秋之季家有藏甲都邑皆百雉之城矣鞅必奔晉陽寅吉射必奔朝歌則是皆叛也王

氏樵曰案邯鄲午無罪而趙鞅專殺不忌其心已無君矣荀寅范吉射不請於君而擅伐之信有罪也鞅

不愬於君而遽興晉陽之甲抗晉人之圍非叛而何是時彊臣皆彊其私邑以耦國無事則專土以自豐

有事則據邑以背叛鞅之欲歸衛貢五百家於晉陽也封殖私邑之計也而邯鄲午慮絕衛親奉命不速鞅以午荀寅之甥荀寅范吉射之姻也疑午有貳心焉因是而遂殺之二家始禍蓋亦有執言矣鞅苟有人臣之禮聽君大夫平其曲直可也而遽入私邑以叛罪豈容誅哉

冬晉荀寅士吉射入于朝歌以叛

荀寅下公有及字朝如字

左傳

范皋夷無寵於范吉射而欲為亂於范氏梁嬰父嬖於知文子文子欲以為卿韓簡子與中行

文子相惡魏襄子亦與范昭子相惡故五子謀將逐荀寅而以梁嬰父代之逐范吉射而以范皋夷代之荀躒言於晉侯曰君命大臣始禍者死載書在河今三臣始禍而獨逐鞅刑已不鈞矣請皆逐之冬十一月荀躒韓不信魏曼多奉公以伐范氏中行氏弗克二子將伐公齊高彊曰三折肱知為良醫唯伐君為

不可民弗與也我以伐君在此矣三家未睦可盡克也克之君將誰與若先伐君是使睦也弗聽遂伐公國人助公二子敗從而伐之

丁未

荀寅士吉射奔朝歌

胡傳

晉主夏盟威服天下及大夫專政賄賂公行內

外離析

示威平丘而齊叛辭請召陵而蔡叛盟

于沙鹹而鄭叛次于五氏而衛叛蒞于鄭會于夾谷畝于黃而魯叛諸侯叛於外大夫叛於內故奔于晉陽而趙鞅叛入于朝歌而荀寅與士吉射叛以晉國之大天下莫彊焉邦分崩而不能守也春秋於晉事或畧而不序或賤而稱人或書侵以陋之責亦備矣至是三卿內叛直書於策見其效也故臧哀伯曰國家之敗由官邪也官之失德寵賂章也晉卿始禍緣衛貢也樂祁見執獻楊楯也蔡侯從吳荀寅貨也昭公弗納范鞅賂也而晉室自是不復能主盟矣故為國以義不以利春秋之大法在焉見諸行事亦可謂

深切著明矣

集說

王氏葆曰鞅入晉陽私邑也寅吉射入朝歌公邑也三人之罪若有等差俱書曰叛者臣之邑

君所賜也據其私邑則專祿以周旋矣趙鞅貪憤專戮其罪宜逐寅吉射以午之故興兵首禍則又為無君故三臣之奔春秋俱以叛書之家氏鉉翁曰人臣不忌其君未有不終於為亂者也晉大夫不忌其君為日久矣衛孫林父逐君晉大夫從而羽翼之魯季孫意如逐君晉大夫又從而羽翼之羽翼他國之亂臣者皆有欲為亂之心也而其君冥然無所悟一聽其所為及是而三卿俱叛夫豈一朝一夕之故哉

李氏廉曰晉六卿二荀氏荀寅中行氏也荀躒知氏也士氏即范氏也韓氏魏氏趙氏荀士二家自此亡知氏春秋後亡故止韓趙魏三家分晉汪氏克寬曰朝歌衛之舊都衛徙楚丘朝歌後屬晉

晉趙鞅歸于晉

左傳

韓魏以趙氏為請十二月辛未趙鞅入于絳盟于公宮

胡傳

案左氏荀范奔朝歌韓魏以趙氏為請鞅入于絳盟于公宮然則書歸者易辭也韓魏為之請

晉侯許之復而寅與吉射去國出奔則無有難之者故其歸為易矣三子之叛其罪一也鞅以有援故得復寅吉射以無助故終叛春秋書鞅歸于晉非與之也以罪晉侯縱失有罪無政刑耳叛逆人臣之大惡始禍晉國之載書既不能致辟於鞅奉行天討以警亂臣又亢不衷徇韓魏之請而許之復無政刑矣其能國乎先儒或謂言歸者以地正國也鞅取晉陽之甲以逐君側之惡人則其說誤矣以地正國而可是人主可得而脅人臣擅興無罪以兵諫者真愛其君也使後世賊臣稱兵向闕以誅君側為名而實欲脅

君取國者則此說啓之也
大夫春秋之意矣

集說

趙氏匡曰公羊云以地正國也據禮臣無專土藏兵之義今乃欲以私邑之彊而正國朝則是

末大而本小也是黜君而進臣也豈其然乎且實以拒范中行耳而云正國非也又云興晉陽之甲以逐君側之惡人也無君命故書叛若無君命則是君與范中行同心也君與之同心而輒興兵伐之是逆亂也而言歸以美之是訓人為逆也又曰穀梁云貴以其地反也豈有身歸而地不歸乎此至鄙近矣又云其入無君命其入無君命則是將如何得歸乎假君不拒苟其自來其惡可知也又何得書歸乎劉氏絢曰趙氏晉之彊宗鞅叛當誅晉侯不能治而許之歸國亂無刑矣胡氏銓曰先書晉趙鞅入于晉陽以叛見鞅據地舉兵以拒晉也次書晉趙鞅歸于晉見君許之還也大夫出奔書歸者君受之也書入者

臣自入也今鞅大惡已著但以君許之歸故書歸責
在君也高氏閔曰二子既出晉侯自謂趙鞅保其
邑以違荀范之難實非叛故許之歸先儒以歸為善
辭遂謂鞅有叛逆而無叛心春秋先正其罪以厲臣
節此許其歸以廣君恩是然人臣無君命輒據土
興兵此豈可赦乎況衛孫林父亦書歸何善之有
陳氏傅良曰欒盈魚石猶書入至鞅而後書歸則晉
無人之辭也叛臣至於書歸則佚賊不足錄矣此韓
趙魏分晉之本也家氏鉉翁曰鞅挾晉陽之甲將
以內向此叛也寅吉射據朝歌外交齊狄以抗其君
亦叛也公羊子乃曰鞅取晉陽之甲欲以除君側之
惡此因鞅歸立義其誤甚矣李氏廉曰案以地正
國之說出公穀大傷教故不敢取胡氏已辨之矣要
之此條歸字之義陳氏說得好而胡氏亦曰使趙鞅
以無罪歸國晉之國法不行於叛逆之人矣前書叛
後書歸罪其赦逆臣也說亦好又曰書大夫歸者九

餘皆書自惟趙鞅不言自季子書來元暄書復特筆也汪氏克寬曰春秋書趙盾弑君而又書趙盾侵陳書趙鞅叛而又書趙鞅歸皆所以責晉君之不討罪也朱子於通鑑綱目書漢梁冀弑帝帝即位益封梁冀萬三千戶唐李輔國殺皇后以李輔國為司空兼中書令皆以譏天子之無政刑此得春秋書鞅叛與歸之意矣

案人臣之罪莫大於叛春秋所必誅也趙鞅專地以叛結韓魏以脅其君復入于晉聖人書之所以譏晉侯之失刑而三卿分晉之禍實始於此也公穀不察謂趙鞅以地正國陸氏淳曰非叛君也孫氏復曰此王法所赦也劉氏敞曰其忠義足恃也謬妄相承不可以訓今竝刪之

薛弑其君比

字比如

胡傳

稱國以弑者當國大臣之罪也孫復以為舉國之衆皆可誅非矣三晉有國半天下若皆可誅

刀鋸不亦濫乎潁川常秩曰孫復之於春秋動輒有罪蓋商鞅之法耳棄灰於道者有誅步過六尺者有

罰其不即人心遠矣王回以是尚秩此善議復者

集說

家氏鉉翁曰泰山孫氏言舉國之人皆可誅此求經之過也儒者辨理未詳立論失中將如秦

漢之用法一人為非流毒一州一道者非獨法家之罪亦學者用意刻深有以濟其為惡不可不謹也

鄭氏玉曰薛比之弑三傳不載其事不敢妄說汪氏克寬曰比弑惠公夷立

附錄左傳

初衛公叔文子朝而請享靈公退見史鰌而告之史鰌曰子必禍矣子富而君貪罪

其及子乎文子曰然吾不先告子是吾罪也君既許我矣其若之何史鰌曰無害子臣可以免富而能臣

必免於難上下同之戍也驕其亡乎富而不驕者鮮
吾唯子之見驕而不亡者未之有也戍必與焉及文
子卒衛侯始惡於公叔戍以其富也公叔戍
又將去夫人之黨夫人愬之曰戍將為亂

乙敬王二十有四年晉定十六年齊景五十二年衛靈
已十四年三十九年蔡昭二十三年鄭聲五

年曹陽六年陳閔六年杞僖十年宋景二十
一年秦惠五年楚昭二十年吳闔廬十九年

春衛公叔戍來奔衛趙陽出奔宋戍式樹反衛趙陽
公穀俱作晉趙陽

左傳十四年春衛侯逐公叔戍與
其黨故趙陽奔宋戍來奔

胡傳公叔戍將去南子之黨夫人愬曰戍將為亂故
公叔來奔趙陽北宮結皆戍黨也故亦出奔而

靈公無道不能正家以喪其大臣之罪著矣戍又以
富見惡於衛侯夫富者怨之府也使戍積而能散以

財發身不為貪人之所怨
於以保其爵位倘庶幾乎

集說

家氏鉉翁曰衛靈不君南子不婦比而為惡亦
既稔矣公叔戌以宗國之老起而正之乃戌之

所得為而非戌之所能為也人臣欲正其君者必先
自正其身其身既正而後可以格君心之非而措之
於善今戌怙富而驕素無國中之譽乃欲以正君自
任事不克而速禍宜也春秋書三大夫之奔所以著
衛亂之所從始

附錄左傳

梁嬰父惡董安于謂知文子曰不殺安于
使終為政於趙氏趙氏必得晉國盍以其

先發難也討於趙氏文子使告於趙孟曰范中行氏
雖信為亂安于則發之是安于與亂謀也晉國有命
始禍者死二子既伏其罪矣敢以告趙孟患之安于
曰我死而晉國寧趙氏定將焉用生人誰不死吾死

莫矣乃縊而死趙孟尸諸市而告於知氏曰主命戮罪人安于既伏其罪矣敢以告知伯從趙孟盟而後趙氏定祀安于於廟

二月辛巳楚公子結陳公孫佗人帥師滅頓以頓子牂

歸二月公作三月孫公作子佗徒何反牂子郎反公作牂七良反

左傳頓子牂欲事晉背楚而絕陳好二月楚滅頓

集說啖氏助曰凡書滅又書以歸及名者罪重於奔者也既責其不死位又責其無興復之志也

薛氏季宣曰陳不思輔車之勢助彊大而滅鄰國不思將自斃也危哉家氏鉉翁曰楚至是始戢諸侯無從楚者而陳以盛德之後猶比而從之春秋書楚結陳佗人連兵滅頓誅楚而罪陳也

夏衛北宮結來奔

左傳

夏衛北宮結來奔公叔戌之故也

集說

高氏閏曰衛靈沈耳於閏以奔其世臣又及其所與是以其國聽之也

五月於越敗吳于檣李吳子光卒

檣音醉公作醉越杜注越國也帝少

康之庶子封於會稽今浙江紹興府檣李杜注吳郡嘉興縣南醉李城今屬浙江嘉興府檣李城在縣

南四十

五里

左傳

吳伐越越子勾踐禦之陳于檣李勾踐患吳之整也使死士再禽焉不動使罪人三行屬劍於

頸而辭曰二君有治臣奸旗鼓不敏於君之行前不敢逃刑敢歸死遂自剄也師屬之目越子因而伐之

大敗之靈姑浮以戈擊闔廬闔廬傷將指取其屨還卒於陘去檣李七里夫差使人立於庭苟出入必謂已曰夫差而忘越王之殺而父乎則對曰唯不敢忘三年乃報越

胡傳

書敗者詐戰也定公五年於越入吳至是敗吳于檣李會黃池之歲越又入吳悉書於史以其

告也哀之元年吳子敗越棲勾踐於會稽之上豈獨不告而史策不書疑仲尼削之也吳子光卒夫差使人立於庭苟出入必謂已曰而忘越王之殺而父乎則對曰唯不敢忘三年乃報越然則夫椒之戰復父讎也非報怨也春秋削而不書以為常事也其旨微矣

集說

許氏翰曰書檣李之敗用見光玩兵滅身以為殘民伐國之戒

公會齊侯衛侯于牽

牽公作堅又作擊齊魯為會止此牽杜注魏郡黎陽縣東北有

牽城路史內黃西南三十里有故牽城今故牽城在
內黃之西南濬縣之北二縣屬直隸大名府濬縣為
漢黎陽與內黃縣接壤

左傳

晉人圍朝歌公會齊侯衛侯於脾上梁之間謀
救范中行氏析成鮒小王桃甲率狄師以襲晉

戰於絳中不克而還士鮒
奔周小王桃甲入於朝歌

脾上梁間
杜注即牽

公至自會

集說

張氏洽曰齊景公欲求霸誅晉之亂臣以正其
國可也當是時孔子已去魯故會齊衛合謀救

范中行氏三國之君同為會
而助不衷故致公以危之也

秋齊侯宋公會于洮

左傳

秋齊侯宋公會于洮范氏故也

集說

許氏翰曰齊宋魯衛崇獎亂逆謀動干戈大義亡矣黃氏仲炎曰齊景公為牽洮之會謀救

范中行氏蓋黨叛臣以敵君也無君臣之義矣家氏鉉翁曰自齊景圖伯衛鄭魯既與之同盟宋猶未忍絕晉至是始及齊為此會蓋始從於齊也傳謂牽洮二會皆謀救范中行若爾四國相率而預於亂也春秋初年諸侯連兵助亂及桓公之霸明分義以示天下此風頓革今齊景欲復祖業而率三國之君往助叛人彼三國之君冥然與之俱而不知黨叛輔逆之為不可世道至是一變春秋降為戰國景公亦有責焉聯書二會皆貶也

案是時衛有公叔戌之難宋有公子辰之難齊景不能為二國定亂乃合謀以助晉之叛臣衛宋不能自治其叛臣而惟齊之從皆非也

天王使石尚來歸脤

脤市軫反周魯之交止此書天王止此

公羊

石尚者何天子之士也脤者何俎實也腥曰脤熟曰膾

穀梁

脤者何也俎實也祭肉也生曰脤熟曰膾其辭石尚士也何以知其士也天子之大夫不名

集說

杜氏預曰石氏尚名脤祭社之肉盛以脤器以賜同姓諸侯親兄弟之國與之共福孫氏復

曰天子祭社稷宗廟有與諸侯共福之禮此謂助祭諸侯也魯未嘗助祭天王使石尚來歸脤非禮也劉氏敞曰穀梁曰石尚欲書春秋諫曰久矣周之不行禮于魯也請行脤不知石尚欲書孔子之春秋乎

魯國之春秋乎若孔子之春秋也孔子是時未作春秋石尚安得書如魯國之春秋也王人至則書之矣何足以為榮邪凡人之欲書春秋者以有殊功異德欲使後世見也石尚何有而欲書乎是始不然高氏閔曰周自王季子來聘之後王命不復加於諸侯矣今敬王有事於社魯未嘗有敵愾之功而天王特使石尚忽為此舉雖天子損禮之甚而聖人於周眷眷如此蓋曰天子之在惟祭與號而已李氏廩曰王使自宣十年王季子之後至此始見蓋晉伯已衰列國無統而孔子相魯之餘魯勢稍振故王室借此以親望國亦一王伯消長之幾會也奈何孔子以為膳肉不至而行則魯之禮又蕩盡歸朕之意何足以感諷魯哉故以常禮言之古者諸侯入朝朝則各以其職來祭故天子祭宗廟有與諸侯共福之禮與之同其事必與之同其樂也周衰諸侯職貢不修祀事不相久矣廟中之賜諸侯何與於此哉敬王乃以脈

肉親魯而歸失禮之大者也然以時事言之則典禮廢壞之餘猶能舉而行之諸侯苟知尊事是王室可以有為之秋惜乎魯之不能奉順此意也春秋書此亦有感矣又曰周禮行人歸脤以交諸侯之福謝氏曰王受神福賴諸侯所致則神福王宜與諸侯共之故天子分俎實不曰賜而謂之歸汪氏克寬曰成肅公受脤於社是助祭而受俎實也襄王使宰孔賜齊侯胙是齊桓有獎王之功而加以殊禮也今定公受國意如即位十有四年既不朝王又不遣使往聘而千里賜宜社之肉非緣助祭於京師曾是以為禮乎王氏樵曰案周魯之交止此書天王止此天子之在者唯祭與號歸脤之後無書焉王室益微矣

衛世子蒯聵出奔宋

蒯苦怪反
聵五怪反

左傳

衛侯為夫人南子召宋朝會于洮大子蒯聵獻孟於齊過宋野野人歌之曰既定爾婁豬盍歸

吾父黷太子羞之謂戲陽速曰從我而朝少君少君
見我我顧乃殺之速曰諾乃朝夫人夫人見太子大
子三顧速不進夫人見其色啼而走曰蒯聵將殺余
公執其手以登臺太子奔宋盡逐其黨故公孟軻出
奔鄭自鄭奔齊太子告人曰戲陽速禍余戲陽速告
人曰太子則禍余太子無道使余殺其母余不許將
戕於余若殺夫人將以余說余是故許而弗
為以紓余死諺曰民保於信吾以信義也

胡傳世子國本也以寵南子故不能保世子而使之
去國以欲殺南子故不能安其身至於出奔是
輕宗廟社稷之所付託而恣行矣春秋兩著其罪故
特書世子其義不繫於與蒯聵之世其國也而靈公
無道不能正家以危其國本至使
父子相殘毀滅天理之所由著矣

集說劉氏敞曰左氏叙蒯聵事曰蒯聵欲殺夫人夫
人啼而走公執其手以登臺太子出奔宋子謂

蒯賁雖不善謀安有此事哉且殺夫人蒯賁獨得全乎彼所羞者以夫人名惡也如殺其母為惡愈大反不知可羞乎蓋蒯賁聞野人之歌其心慙焉則以謂夫人夫人惡其斥已淫則啼而走言太子殺余以誣之靈公惑於南子所言必聽從故外則召宋朝內則逐公叔戌趙陽彼不恥召宋朝固亦不難逐蒯賁矣此其真也不當如左氏所記又蒯賁出乃奔宋宋南子家也蒯賁負殺南子之名而走又入其家使真有此事者敢乎哉此亦一證也劉氏絢曰蒯賁出奔春秋不去其世子者衛侯之罪也南子之惡亦已甚矣其欲去世子之意亦已明矣如哀姜亂魯驪姬亂晉若此比者不鮮矣而靈公聽南子之譖謂蒯賁欲弑其母不能為辨明以致其出奔豈非靈公之罪乎自古讒婦之誣其子者多矣張氏洽曰考二劉之言足以知左氏所記乃南子之讒言而非當時之實錄也李氏廉曰此條公穀亦無殺母之事張氏取

二劉之說極得事情謝氏亦曰驪姬害晉南子害衛其情一也然則申生蒯瞶之賢否雖異而晉獻衛靈之聽讒則同故皆書世子汪氏克寬曰二劉張氏之說固善然皆泥於書世子之義故疑左氏之說然楚商臣蔡般弑君而書世子豈亦與之乎竊考蒯瞶忘父之喪而致他人使之讒忘子之親至迫以兵而必奪之位其於人倫天理泯滅幾盡則其恥南子之淫行而欲殺之固有是事朱子集注於論語二章皆以蒯瞶欲殺母得罪於父則左傳未可盡廢也詳觀經文書趙鞅帥師納衛世子于戚不曰世子復歸而書納則蒯瞶有罪明矣何休乃云子雖見逐無去父之義舍其大而論其細何居鄭氏玉曰蒯瞶無弑母之事二劉辨之詳矣或者猶有疑於戲陽速之言不知讒人何所不至聞夫人之啼知其欲歸罪大子即迎合夫人之意誣大子曰戲陽速禍余謂其姦人之所為世常有之大子告人曰戲陽速禍余謂其誣已也此

等之言何足信哉 王氏樵曰案傳曰男女有別夫婦有義而後父子親父子親而後君臣正豈不信哉衛靈公以寵南子恣其所欲為之召宋朝而蒯聵至於欲殺夫人弗克而出奔身死而以孫為嗣致據國拒父治及再世皆父不父而子不子則以南子故也君人者治教所出治莫先於刑家教莫先於大子許世子止不知嘗藥累及許君父子無相去之義況世子乎書曰衛世子蒯聵出奔宋其以首惡罪靈公而以亂易亂為蒯聵之不子而不可以復世其國也豈不深切著明矣夫

案朱子論語集注固引胡氏說載蒯聵欲殺母事然二劉之論似得當時事情張氏洽朱門高弟亦有取焉今故竝存之以俟再考

衛公孟彊出奔鄭

集說

高氏閔曰比年志公孟帥師此衛國用事之卿靈公疑其為蒯聵之黨而逐之屢書大夫之奔

著靈公之

無道也

宋公之弟辰自蕭來奔

集說

高氏閔曰宋公不能容一弟既使為奔亡之臣又使為叛逆之臣奔而入叛叛而復奔三書宋

公之弟皆以罪宋公也

胡氏銓曰書公弟見宋公

失兄之道也書自蕭罪辰

據邑以叛也書來奔罪魯

納叛臣也

汪氏克寬曰鄭莊公之弟段出奔共則書鄭伯克段而不言弟所以責鄭莊志殺其弟無親

親之恩也宋辰出奔屢書弟者又以責宋景之寵嬖臣而乖兄弟之義也金氏賢曰春秋三稱宋公之

弟者非愛辰也非恕辰

也蓋累乎其兄之辭也

大蒐于比蒲

比音毗
書蒐止此

集說

孫氏覺曰春秋田狩之事公行者必書公公觀魚于棠公狩于郎隱桓之時政猶自公出也自

昭之蒐紅政在三桓蒐田之禮雖公自行皆曰大蒐而不曰公焉所以見公之不得為政而大夫專國也

張氏洽曰蒐而邾子來會則公親蒐矣而不書公以軍政不屬公而專於三家則季叔孟孫氏之所為

也汪氏克寬曰哀二年三卿並將伐邾兵權仍在三家且不念邾子會公來朝奔喪之勤而取鄆沂之

田則公不得與兵政可知矣

邾子來會公

集說

杜氏預曰會公于比蒲來而不用朝禮故曰會孔氏穎達曰莊二十三年公及齊侯過于穀

蕭叔朝公就過處行朝禮故曰朝此就蒐處行會禮而不用朝禮故曰會也言不用朝禮辨其與蕭叔文異石氏介曰諸侯相見於郤地曰會考禮正刑一德以尊天子春秋會禮非復如古之制也今公蒐國內而邾子就會之非禮甚矣過非所朝之地而蕭叔朝公於穀蒐非所會之地而邾子會公於蒐會者既非受者亦失交譏之也陳氏傳良曰自舍中軍公不與兵政者四十年矣於是在比蒲則以季孫斯叔孫州仇之墮費邱也故曰政逮於大夫四世矣故夫三桓之子孫微矣黃氏仲炎曰邾子來會公者會公于比蒲也其不言公蒐于比蒲者公雖在比蒲而治兵之事實三家主之公不與也李氏廉曰公及齊過穀而蕭叔朝公大蒐于比蒲而邾子來會公皆非其所也汪氏克寬曰文十三年衛侯會公于沓鄭伯會公于棐皆書地此不書地則知來會于比蒲無疑也

城莒父及霄

莒父魯邑案莒係以父魯人語音如梁父亢父剛父是也今莒州地霄魯邑在今

莒州境

集說

杜氏預曰公叛晉助范氏故懼而城二邑也此年無冬史闕文孔氏穎達曰城邑之由傳無

其說以傳稱公會齊侯衛侯謀救范中行氏知為叛晉之故懼而城此二邑也趙氏鵬飛曰城莒父及

霄以城二邑書也一時而城二邑勞民甚矣家氏

鉉翁曰譏勞民城諸防城諸鄆同例又曰何休云是

年孔子以大司寇攝相事齊人饋女樂孔子去不書冬者貶也此牽合之說夫聖人豈以去位之故而削

冬不紀乎汪氏克寬曰莒比蒲城莒

父及霄其事蓋皆在冬但脫冬一字耳

附錄左傳

冬十二月晉人敗范中行氏之師於潞獲籍秦高彊又敗鄭師及范氏之師於百泉

百泉衛地在今河南衛輝府輝縣西北蘇門山下衛源也一曰百門陂亦曰百門泉

丙敬王二十有五年晉定十七年齊景五十四年鄭聲六年

曹陽七年陳閔七年杞僖十一年宋景二十二年秦惠六年楚昭二十一年吳夫差元年

春王正月邾子來朝

邾朝止此

左傳

十五年春邾隱公來朝子貢觀焉邾子執玉高其容仰公受玉卑其容俯子貢曰以禮觀之二

君者皆有死亡焉夫禮死生存亡之體也將左右周旋進退俯仰於是乎取之朝祀喪戎於是乎觀之今正月相朝而皆不度心已亡矣嘉事不體何以能久高仰驕也卑俯替也驕近亂替近疾君為主其先亡乎

集說

汪氏克寬曰邾子以去年來會為未成禮故復來朝未幾奔魯之喪其卑屈亦甚矣

鼯鼠食郊牛牛死改卜牛

公羊

曷為不言其所食漫也

集說

范氏甯曰不言所食食非一處而至死趙氏匡曰常怪鼯鼠食郊牛致死上元二年因避地

旅於會稽時牛災小鼠噬牛纔傷皮膚無有不死者

戴氏溪曰魯之僭郊自僖公始其說可信蓋僖公

之前春秋未嘗書郊此其證也然而魯之先公猶畏天災故因災而不郊者間有之若定之終哀之始蓋習玩既久雖天災亦不知所畏矣黃氏震曰高氏集注曰魯不當郊郊牛死傷廢牛可也而改卜牛是

違天也

二月辛丑楚子滅胡以胡子豹歸

左傳

吳之入楚也胡子盡俘楚邑之近胡者楚既定胡子豹又不事楚曰存亡有命事楚何為多取

費焉二月

楚滅胡

胡傳

滅人之國其罪大矣然胡子豹乘楚之約盡俘其邑之近胡者所謂國必自滅而後人滅之非

滅之者獨有罪也國君造命不可委命者既以為有命而又貪生忍辱不死於社稷則是不知命矣書以歸罪豹之不能死位而與歸也

集說

家氏鉉翁曰名陵之會頓胡之君皆在曰以侵楚也是後楚有吳患不能報去年滅頓今年滅

胡所以報名陵之怨蓋吞嚥小國以快其宿憾也

夏五月辛亥郊

公羊

曷為以夏五月郊三卜之運也

集說

高氏閌曰魯郊當在孟春今以改卜牛在滌三月故至五月乃郊趙氏鵬飛曰五月非郊之

時以改卜牛也帝牛在滌三月至是養牲始成故五月而郊李氏廉曰此以牛死改卜而致失時也

汪氏克寬曰不書卜郊徐彥疏云言郊則知卜吉可知夫正月改卜牛若在滌三月則當以四月郊今郊

以五月蓋卜以四月郊而不吉又卜五月必龜從而後郊也故但書改卜牛不書卜郊經於卜郊不從則

書之以譏瀆卜卜而從則但書郊之過時以譏其慢耳嘗考史記云定公十四年魯郊不致膳俎於大夫

今春秋不書十四年郊則郊之不見於經者多矣惟因其失禮之中又失禮者則書以示貶而因見魯郊

之僭也

壬申公薨于高寢

左傳

夏五月壬申公薨仲尼曰賜不幸言而中是使賜多言者也

穀梁

高寢非正也

集說

杜氏預曰高寢宮名不於路寢失其所許氏翰曰內卒凡十一公得正而薨者惟莊宣成

趙氏鵬飛曰定公乘昭公之後政在季氏粗能收攬國柄親盟親會親兵魯民粗知有君其賢於昭公遠矣一用孔子相夾谷之會齊人懾屈來歸侵地惜乎用之不久抑亦天未欲平治天下乎李氏廉曰定公在位十有五年當其初立受國於季孫意如而不能正其罪其異於桓宣者無幾矣陽虎既奔之後三

桓亦微孔子為政綱紀麤立正當可以有為之時然竟不能使夫子得遂行其道則魯何賴哉李氏曰會于夾谷而致侵田之歸行乎季孫而有墮都之謀雖僅能明禮義之教雉門兩觀之作而僭禮未之改寶王大弓之竊而分器莫之保惜於女樂政歸彊家此定公有聖人而不能用人也其言得之矣至其末年會牽會洮城莒父城霄無非助亂勞民之舉魯之益弱宜哉

鄭罕達帥師伐宋

罕公作軒

左傳

鄭罕達敗宋師於老丘

老丘杜注宋地今河南陳留縣北四十五里有老丘城

集說

杜氏預曰宋公子地奔鄭鄭人為之伐宋欲取地以處之許氏翰曰宋大國也至於景公而

鄭能困之則桓魋之為也無競維人豈不信哉王
氏葆曰鄭納宋叛人已可罪矣又伐大國以居叛人
此不待貶黜而罪惡見李氏廉曰自罕達伐宋之
後有哀七年皇瑗之侵九年雍丘之取其秋宋公伐
鄭十年夏宋人伐鄭十二年宋向巢伐鄭卒至十三
年罕達取于岳之師而後已焉二國之構怨如此正
與隱公初年公
子馮之事相類

齊侯衛侯次于渠蔭

渠蔭公作蘧蔭
渠蔭杜注宋地

左傳

齊侯衛侯次于蘧挈謀救宋也

集說

杜氏預曰不果救故書次趙氏鵬飛曰欲救宋而不能也且鄭非彊國合齊衛以敵之何懼

而不救嗚呼是則有其故矣齊景初求諸侯鄭先附之既而得衛得魯皆鄭謀之最後宋亦附齊前年洮

之盟是也今鄭伐宋欲救宋則失久好之鄭欲勿救則失新附之宋故出兵以觀望於二國之間此齊侯之姦謀也

邾子來奔喪

諸侯始奔喪

公羊

其言來奔喪何奔喪非禮也

穀梁

喪急故以奔言之

集說

杜氏預曰諸侯奔喪非禮十年傳曰諸侯之喪士弔大夫送葬諸侯親自

奔喪會葬皆非禮公羊亦云奔喪非禮也劉氏絢

曰當周之衰天子崩葬諸侯皆無奔喪會葬之事而

邾滕反行於彊大之國非禮明矣趙氏鵬飛曰邾

自昭公之世為魯所虐定公為拔之盟終其世不犯

於邾邾人德之故來會來朝今又忘其卑屈而奔喪
焉於禮雖非而於情則甚惻矣大之比小春秋鮮能
定公有之而非邾人奔喪滕子會葬說者皆
責邾子之非而吾於此見定公之仁也

秋七月壬申如氏卒

如穀作弋

公羊

如氏者何哀公之母也何以不稱夫人哀未君

穀梁

妾辭也哀公之母也

集說

啖氏助曰自成風之後妾母皆僭用夫人禮故書薨書夫人著其非禮也哀公母定如卒時子

未踰年雖行喪禮不可加於母故書卒子既未成君

故不稱夫人也劉氏敞曰左氏云不稱夫人不赴

且不祔也非也安有夫人卒而不稱夫人者乎凡夫

人始卒則史書之書之固云夫人矣不待赴祔而書

其夫人也此如氏要為哀公之母定公之妾哀公未
成君故亦未敢謂其母夫人耳 胡氏寧曰如氏不
稱夫人為正名孟子不稱夫人為隱惡如氏定公妾
也公羊據魯失禮言之爾論春秋之法哀雖已君豈
得稱夫人乎來賄仲子會葬成風深貶天王而名冢
宰則知哀雖已君亦不得稱夫人矣 陳氏傳良曰
自成風訖於宣襄子苟為君則其母為夫人書葬定
如則是哀公以夫人葬其母猶宣襄也則何以卒不
稱夫人葬不稱小君徒以
喪在殯不及尊其母焉耳

八月庚辰朔日有食之

九月滕子來會葬

集說

杜氏預曰諸侯會葬非禮也 范氏甯曰邾滕
魯之屬國近則來奔喪遠則來會葬同之王者

書非禮 薛氏季宣曰魯至弱也而二君為非禮之會況疆大乎 趙氏鵬飛曰以大夫正也親會之非禮也 家氏鉉翁曰周衰小國以事王者之禮事大國魯君嘗奔齊晉之喪會楚之葬春秋不書諱之也 邾滕二君來奔喪會葬而皆書者非嘉其來志其禮之僭也

丁巳葬我君定公雨不克葬戊午日下昃乃克葬

昃穀作稷

左傳

葬定公雨不克襄事禮也

穀梁

葬既有日不為雨止禮也雨不克葬喪不以制也

集說

趙氏匡曰乃急辭也案凡稱乃緩辭也不得云急詳經意識臣子緩慢耳 孫氏復曰雨不克

葬譏不能葬也葬不為雨止戊午日下昃乃克葬言無備之甚也 高氏閔曰葬敬贏言日中而克葬此

言日下昃乃克葬日中則裕於日昃矣君子之於親不忍一日離也故葬日虞所以寧親也日下昃則失虞之時矣家氏鉉翁曰左氏以翼日葬為得禮穀梁以塗車蓑笠不具為非制二者在孝子慈孫之誠敬何如耳雨而無害於力役葬可也或天變駭異雨甚水至不可即土左氏之說亦未為失然國君之葬宜無不備雨不克葬明日乃克葬謂之無貶不可也

辛巳葬定如

公羊定如何以書葬未踰年之君也有子則廟廟則書葬

胡傳公羊曰有子則廟廟則書葬曾子問竝有喪則如之何子曰葬先輕而後重其奠也其虞也先

重而後輕

集說

禮記曾子問篇注同時有父母或祖父母之喪葬則先母而後父奠則先父而後母葬是奪情

之事

故先輕奠是奉養之事故先重虞祭亦奠之類也杜氏預曰辛巳十月三日有日無月徐氏彥

曰定公

五月薨定公如七月卒非其竝有喪禮是以先葬定公後葬定公如若其同月當定公先葬矣劉氏

敞曰左氏云

不稱小君不成喪也非也若如氏實夫

人固當書夫人

如氏薨已而曰葬定公不稱小君明

不成喪以責臣子

可也今日如氏卒此非夫人也非

夫人而書葬定公

宜矣何足以見不成喪乎欲責不

成喪而薨不稱夫人

是適足貶小君之尊而不足見

臣子之罪也王氏樵曰諸家皆以哀未踰年之君

故定如止書卒葬而不書夫人

以薨小君以葬此皆

因諸侯僭禮而為之辭其實子雖踰年成君亦不得

夫人其妾母也自成風以來妾母皆僭用夫人之禮

故春秋亦從而書夫人薨書葬小君以著其非禮如

氏哀公之母定公之妾已君未君皆不得稱夫人卒
曰姒氏卒葬曰葬定姒皆正名也非以未踰年不稱
夫人小君而已
踰年則可稱也

冬城漆

集說

杜氏預曰邾庶其邑張氏洽曰城漆謀伐邾也定公之喪邾子來奔事魯謹矣哀公初立不

務善鄰而以土地之故勞民力啓民怨二年取其田
七年俘其君卒使吳人乘間以伐其國齊人問罪而
取謹闡利未得而害隨之謀國如此其不終也宜哉
汪氏克寬曰左氏云書不時告夫他國有事或過
時而告於魯豈有魯國城邑過時而
告於廟可以掩其罪乎此非人情也


欽定四庫全書

多
分
卷
三
十
五

五十二



欽定春秋傳說彙纂卷三十五



覆校官編修臣張秉愚

校對官編修臣鄭燦

膳錄監生臣莊經明